

- GIRU ARCHEOLOGICU IN SARTÈ

<http://www.chibu.fr/?p=14740>





Giru archeologicu in Sartè

Nantu l'isula sò tanti i siti archeologici di l'età di u bronzu ! Vistu a superfice di a cumuna di Sartè sò unepochi custindi. In issi lochi ùn hè micca faciule à ghjunghje ci è parechji sò insignati in modu micca chjaru.

U spassighjà cù e maghjine

Simu andati in un situ trà i più impurtanti è acunciati d'issu rughjone : u pianu Cauria.

A pazienza, ci vole à avè ne da truvà u puntu chì ci parte issa passighjata. Di fatti parechji anu messu in dubitu i scrittoghji chì l'insegnanu. Ma ùn purtate penseru : l'entrata precisa a vi insegnu in a rubrica *qui*.



- Prima di ghjunghje à u locu si avanza longu à un campu magnificu.
- **Spassighjata in u neuliticu**

Ghjunti nantu à u situ, tuttu vene chjaru. Hè accunziatu per tuttognunu un parcorsu di scuparta è chì permette di scopre varii lochi di vita di u neuliticu.







Si principia cù un'infilarata di *menhirs* capaci di altura, *I Stantari*. Certi tenenu sempre à bastanza particolari. Ci si pò vede e strisce fatte in a petra da una spada, o dinù qualchì capu. Ma omu s'accorda à dì chì da un annu à l'altu da ch'elli funu alzati issi stantari, isse sculpiture si squassanu, segnu chì u granitu si sdrughje longu à l'anni.



- L'infilare di stantare sò parecchie



- Certe sò sculpite in modu precisu precisu



- U chjassu tira avanti sinu à un ochju d'acqua

U chjassu ci porta sinu à un'altra infilarata, *Renaghju*, pocu dopu à un bellu ochju d'acqua duve e giunchiglie salvatiche stinzanu i so pedali ver'di u sole. Dopu, à pena più insù, si scopre u **dolmen di Funtanaccia**, cù a so statura impressiunante à bastanza!



- A infilarata o gruppu di U Renaghju stà sottu à e lecce



• Ci ne h  di pi , ma unepochi in gattivu statu.



- Unepochi sò sdraiati in pianu



- Hè u locu da fà ci a merendella ! Attenti, petre ùn si ne tocca.

Da sapè ne di più vi dumandu di andà à leghje quì sottu l'indicazione ch'omu trova nantu à u situ (ci vole à cliccà [quì](#)).



• U locu hè bellu assestatu.



- Un cane di pastore , cumpagnu di una stundetta, hà fattu cun noi a spassighjata.



- Sottu à l'arburì, à mezu parcorsu, ci sò agrotti sott'à pentoni.



- U chjassu hè propiu una campa.



- U dolmen di Funtanaccia hè prutettu da chè nimu ci pudessi cullà nantu



• Di taglia hè propiu un sprupositu.

Ancu di più stantare aggruppate insieme

In giru à Cauria, s'ellu vi ferma un pocu di forza è di tempu, vi prupongu di scopre altre meraviglie lacate ci da l'antichi.



• infilarata di Palaghju

Ripigliendu a strada ver'di Tizzà si pò raghjunghje u situ di l'infilarate di Palaghju. Ci vulerà à viaghjà una cria di più ma nunda tremendu..

In u chjassu si scopre in più una bella custruzione in ruina di dimensione à bastanza maiò. Segnu di a divizia in issu locu in tempi ch'ùn sò tantu landani. Palaghju hè nantu à un terrenu privatu è in gattivu statu...

Si ponu vede sette insemi di petre sculpite. Nantu à certe ci sò segni di facce o d'arme. Altre parenu micca compie.

Quand'ellu hè statu scupertu issu situ, ci eranu dinù cascioni di petre, certi mai aperti. L'ogetti trovi indrentu sò in u museu di a cità.



• Porta di a casa ch'omu trova strada facendu



- U situ hè in gattivu statu.



- E stantare sò quasi tutte in pianu.



- Ma certe sò belle infilarate

Stantare è cascioni scantati

In un chjosu vicinu à u chjassu da induv'ellu si parte per Palaghju ci era prima un'altra infilarata più chjuca, quella d'Apazzu, ma dopu stata arritta

più di 6000 anni, a tuntia umana hà supranatu issa vistica di u passatu. Ci sarianu in a machja sempre unepoche di stantare.

Nantu à a carta quì sottu truverete u locu d'altre stantare è cascioni scantati in issu settore. Pudete dinù ricullà ver'di Pitretu è Buchisgià duv'ellu ci hè parecchi siti da scopre.



Castellu d'Alo Bisusgè

Quì si parla di una furtezza o un castellu. In realtà si tratta di un situ turreu cum'ellu si ne pò truvà vicinu à Pitretu è Buchisgià o in Cucuruzzu.

Hè nantu à una cullettula ed hè cumpostu da una torre alzata nantu una cava è trè altre cave vicine. À pena di più à sudueste si ponu vede e vistiche di rifugi è di stantare.

Quassù a vista hè magnifica !



• U situ d'Alu Bisusgè

CIÒ CHÌ SI PÒ LEGHJE SOPRA À LOCU

STORICU

U situ, Prosper Mérimée l'hà visitatu in u 1839 ma hè solu trà 1964 è 1968 chì st'infilarata hè stata purtata à u chjaru è ristabilita da Roger Grosjean cum'è vo a vidite oghje. Sgagia, indirizza è rimpianta monoliti da cumpone duie infilarate parallele orientate da nordu à sudu : sò 11 stantare, statule-stantare è stele. In u 1975 issa infilarata hè stata classificata Munimentu storicu. In u 1992 a Cullettività territoriale di Corsica l'acquista. In u 1994, principianu i scavi archeologichi diretti da Andria d'Anna, in u quattru di a valorizzazione di u situ da a CTC. Issi travagli riguardanu di prima l'infilarata di Renaghju (à 400m à u Sudu) è po dopu quella di I Stantani, da u 2001.

DESCRIZIONE

Attualmente u situ t'hà più di un centu di monoliti è frammenti chì pè u più sò sdraiati sottu terra. Pè u più di granitu isse petre sò state cacciate da affiuramenti di scogliu distanti da unepoche centinaia di metri. Vistu u statu attuale di ciò ch'è no ne cunniscimu, a so storia a puderiamu cuntà cusì:

- **1a tappa : erezzione à u Neolicu mezanu** (ver'di 4500 – 4100 anni prima di a nostra epuca) di piccule stele alte di 50 à 80 cm;
- **2a tappa** : custruzione di un munimentu cun duie file orientate nordeste/sudueste. Issu munimentu pare anteriore di 1500 anni prima di a nostra epuca (Età di u bronzu mezanu);
- **3a tappa** : custruzione di un altru munimentu, cun si pò dà 3 file orientate norsu/sudu, in particolare cù e statule-stantare maiò è e stele sculpite. U funzionamentu maiò di u situ si mette à u principiu di l'Età di u Bronzu finale (trà 1300 è 900 anni prima di a nostra epuca). À iss'epuca u pianu di Cauria era assai pupulatu (cun siti furtificati è munimenti megalitichi);
- **4a tappa:** u munimentu imeghjurisce è si ne fala. Saria in parte distruttu trà 200 è 50 prima di a nostra epuca, durante a rumanizzazione. À l'ultimu, durante attività agricole muderne, certi monoliti ghjuvaranu à alzà muragliette da chjode i chjostri o mandrie à vicinu.

E STATULE-STANTARE È E STELE SCULPITE

Issi monoliti sò di u munimentu alzatu à a fine l'Età di u Bronzu. Forse ammentarianu persunagi celebri, guerrieri, capiclanu...

E duie statule-stantare. Sò trà e più emblematiche di Corsica. Tremindue sò listesse benchè di forme è dimensione diferente. T'anu una figurazione doppia : antropomorfa è fallica. U latu orientatu à l'Este rapresenta un individu ch'è t'hà attributi di guerrieri: elmu cun duie cupule, spada, curazza è po dinù una forma triangulare interpretata da piattasessu, tenutu cù una cinta. U latu orientatu à l'Ueste rapresenta un fallu arrittu, cun particolari anatomici precisi.

E stele armate. Sò state identificate trè stele ma solu duie t'anu attributi guerrieri chì si ponu leghje oghje. A so figurazione umana hè sugerita solu da i so attributi : una spada verticale appesa da un portaspada nantu à a faccia este è a faccia ueste ùn hè sculpita.

ISSE INFILARATE, CHÌ SARÀ STATA A SO FUNZIONE ?

In generale a so urientazione hè nordu-sudu, cù a faccia di e stantare è statule-stantare ver'di l'este. Si trovanu nantu à vie di passagiu, à l'incrucivie di chjassi, nantu à bocche muntagnole o dinù, cumu pè I Stantari, Renaghju è Palaghju... vicini à ochji d'acqua o surgente, è cum'è issi munimenti, purtà si à dossu sepulture megalitiche. Òn sapemu nunda di e so funzione suciale, cumemurative, culturale, simboliche ma u fattu ch'elle fussinu state alzate illustra una vuluntà propiu d'insignà un territoriu, di impatrunì si di un spaziu. Òn sò state alzate à casu, è forse insegneranu penseri materiali ed ecunomichi ligati cù e cundizione di una vita durevule pè una sucetà.